

LA CARTA DEL APÓSTOL SAN PABLO A LOS GÁLATAS

Pablo escribe a las iglesias en Galacia

¹ Nugö, dûr Pablo, úr jmandaderogui car Jesucristo. Jí mûr cjahnitjo ca hnáa ca bi hñixqui gá apóstole, cja jin gui cjahnitjo cù to xpá menquigö. Guejtse car Jesucristo, yojmi car Tzi Ta jitzi bú penqui pa gu man nár evangelio. Car Tzi Ta jitzi bi xox cam Tzi Jmujü Jesús bbü ya xquí du, cja car Jesús bi ddajqui cam cargo. ² Nugö co cù pé dda cjuadä cù i bbüjcua, dí zenguaquijü, göhtjo cù hermano cù rá bbüh pü jar estado ca i tsjifi Galacia. Dí penquigöju nár carta-nä. ³ Ca Ocja cam Tzi Tagöjü, yojmi cam Tzi Jmujü, car Jesucristo, da ddahquijü bendición cja da möxquijü pa da hmüy rá zö quir tzi mayjü. ⁴ Bi dö cár vida por rá nguejcöjü car Tzi Ta Jesús. Bbü mí du-ca, bi guti ca rá nttzo ca xtú øtiju pa bi weguijü digue yü cjahni yü rí den nár mundo, como nucü, i bbüjti úr dyé ca Jin Gui Jo. Bi ncjapü gá dyøti car Jesús ncja ngu xquí mbën ca Ocja, cam Tzi Tajü. ⁵ Rí ntzöhui gu xöjtibijü car Tzi Ta jitzi cja gu ihtzibijü göhtjo úr tiempo nim pa jabü gár tzøyajü. Amén.

No hay otro mensaje de salvación

⁶ I ndo dyo nám maygö digue ca dí øde. ¿Cja ntjumüy ya xquí ne gui jiejmü ca Ocja? Guegue-ca bi nzohquijü co cár tzi ttijqui cja bi ñajtiquijü quer salvaciónjü por guegue car Cristo. Nuquejü, ¿cja

ya xquí ne gui jiεjma-çä pa gui tεnijü hnahñö ur mensaje ca i tsijfi ur evangelio? ⁷ Hnaatjo ur mensaje i bbüy ca da ddahquijü car nzajqui ca jin da tjegue, gue car hñü ca dú xihquijü, jøntsje-çä. Nu ca xí ncja, i bbü cü dda cjahni cü xí xihquijü pé hnahñö ur mensaje, eso ya jin guí padijü ja ndrá nguehcä guí ne gui hñemejü. Gueguejü xí xihquijü, jin gui jøntsje car Cristo gui hñemejü pa gui töti quer salvaciónjü. ⁸ Bbü to da xihquijü pé hnahñö ur mensaje gui hñemejü pa gui töti jin da nzajqui ca jin da tjegue, bbü jin gui jñejmi ca dú xihquijü, ca Ocja da castiga car cjahni çä, da bbëdi. Guejquitjogö hneje, bbü gu xihquijü pé hnahñö ur hñü ca jin gui cierto, ca Ocja da castigagui hneje. Hasta guejti hnar ángele ca xtrú ngah pü jitzi, bbü jin di xihquijü, gue car Jesucristo gui hñiti ir møyü, ca Ocja di castiga hneje. ⁹ Dú xihquijü máhmeto cja pé dí xihquijü ya, bbü to da xihquijü hnahñö ur mensaje pa gui töti quer salvaciónjü, cja jin gui gue car hñü ca ya xcú dyødejü, da bbëh car cjahni-çä.

¹⁰ Ngü i bbüh cü dda cjahni cü i ñáguigö bbëtjri, i xihquijü, bbü ndí nzohquijü, ndí xihquijü hnar hñü ca jin gui ntjí pa gua jojtiquitjojü. ¿Te guí mbeníjü ya, cja dí jon car manera ja gár johti yü cjahni? ¿cja jin gui gue ca Ocja dí ne gu tzöpi? ¿Cja xtú mängö yü palabra yü xtú jüxcua pa gu jojtiquijü? Bbü jí bbe ndí eme nür evangelio, ndí pejpi yü cjahnitjo cja ndí joni ja ndár tzöpi-yü. Pe nuya, ya xtú eme, jin gui tzö gu mbení ja gár johtitjo yü cjahni, como nuya, gue car Jesucristo dí pejpi.

Cómo llegó Pablo a ser apóstol

11 Nuqueju, cjuaqda, pa gui paqdiju

jabu güí hñeh
 car evangelio ca dú xihquiju, jin gúr mfeni tema
 hñøjøtjo. **12** Jin tema cjahnitjo bi xijqui car pal-
 abra-ca. Jin to gá ujtigui ja i ncja. Guejtsje car
 Jesucristo bi nzojqui, bi xijqui ja i ncja.

13 Nuqueju, ya xcú dyødeju ja mí ncja cam vida
 mahmeto, bbu ndí tendigö cár religión cu judio. Ya
 xquí paqdiju

ja ncja ndár ndo ubbe car evangelio,
 cja ndí ndo an cu cjahni cu mí ten car Cristo. Ndí
 ne gua pungö göhtjo-cu. **14** Göhtjo mbo um tzi may
 ndí tengö cár religión cu judio. Más ndí ndo tengö
 cu costumbre cu xquí zogui cu ndom titaje ni ndra
 ngue cu pé dda hñøjø cu ddáa ndár teje. Nxøjtjo
 ndúr judio rá zö. **15** Nu car Tzi Ta jitzi ante que
 gua hmay, ya xquí juegui pa gua pejpi guegue. Cja
 bbu mí zøh car pa ca xquí mbeni, göhtjo co cár tzi
 ttijqui bi nzojqui. **16** Bi nigui cár Tzi Ttu pu jabu
 ndí dyo, bi nzojqui cja dú meya toca, dú eme. Cja
 bi mandadogui gua xih cu cjahni cu jin gui judio
 nar evangelio. Bbu mí nzojqui car Cristo, jin dá
 ma jongö to gua nabbe, pa gua öpi di ujtigui nar
 evangelio. **17** Guejto jin dá ma pu Jerusalén pa
 gua naje cu hñøjø cu ya xquí ttun cár cargoju gá
 apóstole, pa di ujtigui-cu. Lugar digue gua jongö to
 gua nabbe, nguetica dú ma pu jabu jin to mí hñani,
 pu jar jöy ca i tsjifi Arabia. Dú dé pu, cja diguebbu
 ya, pé dú coh pu jar ciudad Damasco.

18 Jin dá ma pu jar ciudad Jerusalén hasta bbu ya
 xquí zu jñu cjeya ca xtá eme car Jesucristo. Nubbu,
 dú ma pu, dú ntjebbe car Pedro cja dú hmabbe
 guegue hnetta um cutta. **19** Nu cu pé dda cu jman-
 dadero cu xquí hñix car Jesucristo gá apóstole, jin

dá ntjεbbe-cu, jøntsje car Jacobo ca mí ncjuadahui car Tzi Ta Jesús. ²⁰ Hasta dí hñih ca Ocja gá testigo, ncjuani göhtjo ya palabra ya xtú juxcö hua. Jin tema bbetjri dí xihquijs.

²¹ Cja diguebbu ya, pé dū ma pu já jöy cu i tsjifi Siria cja co pu Cilicia. Pe jí bbe ndí pa pu jar estado Judea. ²² Eso, cu hermano cu xquí hñeme car Jesucristo, cu már bbuh pu jar estado Judea, jí bbe mí meyagui, como jí bbe ndí ntjεje-cu. ²³ Jøntjo xquí dyøjtiju te mí man cu cjahni bbu ndú pöti ca ndí eme. Xtá jeh ca ndür judio, ya xtá eme car Jesucristo. Mí majm: “øde, car cjahni ca mí unguijus máhmeto, ya xqui eme cam Tzi Jmujus Jesús. Masque mí nejmaja di cjuajti yu i eme, nuya i dyo, i predica nør evangelio.” Ncjanu gá man cu hermano-cu. ²⁴ Cja mí ndo öjpiju mpöjcje ca Ocja porque guegue xquí pötigui cum mfeni.

Los otros apóstoles aceptan a Pablo

2

¹ Cja bbu ya xquí tjo catorce año ca xtá eme car Jesucristo, pé dū yojpi dū pøx pu Jerusalén, ndí yobbe car Bernabé. Guejtjo hnø dū tzixibbe car Tito. ² Bi xijqui ca Ocja ndí nesta gua ma pu, eso, dū ma. Bbu ndár bbuh pu Jerusalén, dū ñaje cu cjuadå cu mí pehtzi quí cargo pu jar templo. Dú möjme hnanguadi, dū ñaje-cu. Dú xijma göhtjo ja mí ncja car mensaje ca ndí ujti cu cjahni cu jin gui judio, pa da döti car nzajqui ca jin da tjegue. Ndí ne gua pødi, ¿cja ntjumus már zö ca ndí ma? Como jí mí meyagui cu cjuadå-cu, guejtjo ndí ne gua xijma ja mí ncja car mensaje ca ndí xih cu

cjahni, pa jin di ccax cu cjahni cu ndí nzofo cja jin di hñemegui-cu. Nu cu hermano-cu bi majmu, már zö ca ndí ma. ³ Jin gá majmu i nesta da ncrajpi yu hñøjø yu i ne da den car Jesucristo ca hnar seña ca i ttøhtibi cu judio. Macja jin gur judio car Tito, cja ndí yobbe-cqa, jin gá mandado cu hermano-cu pa di ttøhtibi car Tito car seña-cqa. ⁴ Cierto, már bbuh pu cu dda fejti hermano cu jí mí eme car evangelio, masque mbá ejmu tsjödi. Cu cjahni-cu xquí ñutiju pa di ccajtiguitjoje, ja mí ncja car mfeni ca ndí tenije desde bbu ndú cuatije jár dye car Jesucristo cja ndú jejme cár religión cu judio. Mí ne di zobiguitjoje, cja di bbujpiguije pa pé gua tenije car ley ca mí man car Moisés, santa di ccajtiguije rá zö ca Ocja. Mí ncjapu nguá xijquiye cu cjahni-cu, cja mí ne di dyetiju car Tito pa di ncrajpi ca hnar seña jár cuerpo. ⁵ Nugö, jin dá jñegui di dagui-cu. Dú dé du ntøxtije. Guejto jin dá jeh cu cjahni-cu di jiöti cu pe dda hermano. Como ndí negö segue gua xihquiu, guí cjahnitjou jin guí judiou, güi töti quer salvaciónu por rá ngue cár tzi pöjö ca Ocja. Gui cuatitjou jár dye car Jesucristo cja jin gui nesta gua töti car ley ca bi zoh car Moisés.

⁶ Nu cu cjuäda cu mí mandado pu jar templo pu Jerusalén bi xijqui már zödi car mensaje ca ndí ma. Jim pé gá jñuhtzi tema ddadyo palabra. Nugö, jin tza dá cjadi muy cár oficio ca mí pehtzi cu cjuäda-cu, como ndí pudi, güí hñeh ca Ocja cam cargo ca ndí pehtzigö, cja nuca, jin gui ccajtiguiu xøtzetjo. ⁷ Cu cjuäda-cu, lugar di xijqui ndí nesta gua pöti ca ndí ma, bi majmu, guejtsje car Tzi Ta jitzi xquí ddajqui cum mfeni-cu cja co cam

cargo pa gua nzoh cu cjahni cu jin gui judio, pa santa di dyøde ja ncja drí dötiju car nzajqui ca ntjumay. Nu car hermano Pedro, ca Ocja xquí uni guegue-caq cár cargo pa di nzoh cu judio, di xih car evangelio-cu. ⁸ Guejtsje ca Ocja bi ddajquigöbbe cm cargobbe, ngu car Pedro nguguigö, xcui mejnquigöbbe gá jmmandadero pa gua xibbe cu cjahni ja i ncja car Jesucristo, tanto cu judio, tanto cu cjahnitjo cu jin gui judio.

⁹ Nu car Jacobo co car Pedro co car Juan mí ndo pehtzi car cargoju entre cu hermano. Guegueju, bbu mí ccahtiju, güí hñeh ca Ocja car cargo ca ndí pehtzigö, bi hñizquigö, cja bi zetiguibbe yam dyebbe, nugö co car Bernabé, bi presentaguibbe delante göhtjo cu hermano. Bi dyøtiju ncjapu pa di fadi, nugöbbe ndí hermanobbe hneje, mí hnaguudi ca ndí emeje, dí göhtjoje. Mí majmu, göhtjoguigöje gua mföxeje gua ótije cár bbefi ca Ocja. Nugöbbe gua nzobbe cu cjahnitjo cu jin gui judio cja guegueju di nzojmu cu judio. ¹⁰ Jøntsjetjo bi dyøjquibbe tzu gua mbenibbe cu hermano israelita cu mí probe, cja gua jmuntzije domi pa gua foxje-cu. Nucá, ya xtá uni um maygö xtá xih cu hermano mí nesta gua ótije-caq.

Pablo reprende a Pedro en Antioquía

¹¹ Diguebbu ya, car hermano Pedro bi ma gá ma pu jar jñini Antioquía, cja hñecö, pé du ma pu hneje. Bbu ndú tzøti pu, du ccahti ja mí ncja nguá dyøti guegue. Car hermano Pedro, ya xquí jieh cu costumbre cu i ten cu judio. Nu cu pa bbu már bbu guegue pu Antioquía, mí ne di cja ncjahmu mí tentjo. Nugö, du huenti, como múr ntjötjitjo

ca mír dyøte. Mí ncøni mí tendi qui costumbre c₄ judio. ¹² Guegue car Pedro, bb₄ cja xquí zøti p₄ Antioquia, mí tzihui c₄ hermano c₄ jí mí judio, masque i ccax-c₄ car ley ca bi zoh car Moisés. Már zö ca mí øti guegue c₄ pa-cá. Diguebb₄ ya, bi zøti p₄ Antioquia c₄ dda cjahni c₄ xcuí hñejm₄ Jerusalén, p₄ jab₄ már bb₄ car cjuād₄ Jacobo. Cja nucá, yojmi car Jacobo, mí tendij₄ c₄ dda qui parte car ley ca bi m₄n car Moisés, eso, jí mí tzihui c₄ cjahni c₄ jí mí judio. Nu car Pedro ya, como mí p₄di ja mí ncja nguá mben-c₄, ddahtz₄ gá wembi c₄ hermano c₄ jí mí judio, hasta ya jí mí tzihui-c₄ hneje. Como guegue mí tzu c₄ hermano c₄ xcuí hñejm₄ Jerusalén. Jí mí ne pa di ccāhtij₄, ¿cja mí tzihui guegue c₄ cjahnitjo? ¹³ Nubb₄, c₄ pé dda hermano p₄ Antioquia c₄ mí judioj₄ bi dñij₄ car Pedro. Ya jin gá jmuntzij₄ co c₄ hermano c₄ jí mí judio pa di zihui-cá. Bi jiejm₄-c₄, pa drí n̄igui ncjahm₄ mír dñendij₄ car ley ca mí m₄n car Moisés. Hasta car Bernabé hneje bi dyøti ntjöti. Ya jí mí mpejnihui c₄ cjahni c₄ jí mí judio, jøntsjetjo pa di johui c₄ ddáa c₄ xcuí hñeh p₄ Jerusalén. ¹⁴ Nugö, dú p₄di te rá nguehc₄ mí øte ncjap₄ car Pedro cja co c₄ pé ddaa. C₄ costumbre c₄ ya xquí jiejm₄, ya pé xi mír dñij₄, ncjahm₄ mí tøhmi di nsalvaj₄ por rá nguehcá. Eso, dú nzoh car Pedro bb₄ már bb₄ p₄ göhtjo c₄ pe dda cjuād₄. Dú xifi ncjhua: “Nuquigue, gúr judio, pe ca ya xquí cuati jár dyε car Jesucristo, xcú jieh ca nguír ten qui costumbre y₄ judio. Bb₄ jí bbe mí tzøj y₄ cjahni y₄ xcuá hñeh p₄ Jerusalén, nuque, nguí bb₄y ncja ngu y₄ cjahni y₄ jin gui judio. Cja nuya, ¿sá pé gri xöjpi ya y₄

cjuaqda-yu da dembi quí costumbre yu judio?" Mí ncjapu ca dú xih car Pedro.

Los judíos, igual que todos, son salvados por fe

¹⁵ Nugöje dí judioje, xtú ejme digue cár cji car Abraham. Jin dá hmepju hnar vida rá nttzo ncja ngu cu cjahnitjo cu jin gui judio, como nucu, jin gui meya ca Ocja. ¹⁶ Cierto, máhmeto ndí tenije car ley ca bi man car Moisés, pe ndejmu dí padije, ca Ocja jin da núg^uuije rá zö por rá nguehcu xcrú tenije car ley. Bí janti guegue, guejquitjogöje, dí ndujpiteje hneje, ncja ngu cu cjahni cu jin gui judio. Jéntsjetjo porque xtú cuatije jár dye car Jesucristo, nuya i ccajtiguije rá zö car Tzi Ta jitzi, cja ya xí nguzquigöje ca rá nttzo ca ndí tuje. Como jin to i bbay ca di zójte göhtjo ca i man car ley, eso, jin to da jiöti da datsje car nzajqui ca jin da tjegue.

¹⁷ I bbu cu ddaa cu i majmu, ca ya xtá cuatije jár dye car Jesucristo, ya xtú ttzontsje cam vidaje, como ya xtú jejme car ley ca bi man car Moisés. Bbu di cierto-cu, di poni ncjahmu gue car Cristo xtrú ujtiguije gri bbepje hnar vida rá nttzo. ¡ur bbetjri-cu! Más rá ndo zö car ddadyo vida ca i ujtiguiju car Jesucristo. ¹⁸ Pe bbu pé dí tendi car ley ca bi man car Moisés, cja pé dí mantsje, ca Ocja da ccajtigui rá zö por rá nguehcu, nubbu, cierto, rá nttzo ca dí øti bbu. Ncjahmu ya xtú co xutja, como ya jin gui gue car Jesucristo dí tóhmi pa da ddajqui cam salvación. ¹⁹ Bbu gua segue gua ten car ley, ya xtrú ttembigui cam castigo, gue car duu, como jin gua jöti gua zójti ca i man. Eso, ya xtú jeh car ley pa xtá cuati car Jesucristo. Xí ncjapu xcá jogui pa ntjumu gu hmay ncja ngu ga ne ca Ocja.

20 Bbu mí du car Jesucristo pu jar ponti, ncjahmu du tugö pu hneje. Pe ndejma dí bbujto, como dí yobbe car Jesucristo, cja xí ddajqui hnar ddadyo hmay. Como xtú cuati jár dye cár Tzi Ttu ca Ocja, dí bbubbe-caq, ya jin dí bbujtsje. Guegue-caq bi negui cja bi ndötsje pa jin gua bbuedi, göhtjo co nam tzi may. **21** Ya jin gu emegö car ley ca bi man car Moisés. Porque bbu gu maq, da jogui gu tatsje cam salvación por rá nguehcq dár ten car ley, nubbu, i tzadi ncjahmu dí mangö, jin dí nesta cár tzi ttijqui ca Ocja. Bbu di cierto-caq, jin di nesta di du car Jesucristo pa di guxquigö, bbu.

La ley o la fe

3

1 Nuquigueju, guí minguju Galacia, ¿cja ya xcú bbeh quir mfeniju? Bbu ndí bbuh pu, du ujtiquipu rá tzi zö ja ncja gá ndu car Jesucristo pu jar ponti, cja co te rá nguehcq. ¿Tocq xí jiöhquiju pa ya jin gui hñemeju car palabra ca du xihquiju? **2** Dí ne gu önquipu tzuu, gui mbeniju ya ¿ncjahmu bi guahquiju car Espíritu Santo? Jin gá nguahquiju bbu ngú tzödiju güi teniju car ley ca bi man car Moisés. Bi guahquiju car Tzi Espíritu Santo bbu ngú hñemeju nar evangelio. **3** ¿Cja ya jin guí padiju ja i ncja nar evangelio, cja huá hnítjo xcú cjaju dondo? Guehcq xcá nzojtiqui ir tzi mayju cár Tzi Espíritu ca Ocja, eso, xcú cuatiju car Jesucristo cja xcú hñemeju. ¿Cja huá más nuya guí inaju i nesta gui teniju cu dda costumbre pa ncjapu gui segue grí teniju ca Ocja? Guí hmeditjoju. Bbu gui hñemeju cu costumbre-cu, jí xquí totiju car nzajqui ca rí hñe jitzi. **4** Bbu ngú

hñemeju car Jesucristo, gú ndo sufriju rá ngu por rá ngue nar evangelio. ¡Lástima xcú sufriju ncjapu, cja nuya i tsijiqui guí ne gui jiejmu nar hñu na ntjumay! Xajmu jin gui cierto ca xí tsijiqui. ⁵ ¿Cja jin guí padiju te rá nguehca ca Ocja xpá mejnquiju cár Tzi Espíritu, guejto xí dyoti milagro pu jabu guí bbapju? ¿Cja guí ingueju, xí dyote ncjapu porque guí teniju car ley? Jina. Guegue xí ddahquiju-cu porque gú cuatiju pu jár dyε car Jesucristo.

⁶ Gui mbeniju te bi meh car Abraham. Guegue múr primero ur cjahni ca bi tsjifi ur judio. Bi hñeme, cierto di ncja car palabra ca xquí xih ca Ocja. Bi ncjapu gá tzoj yí dö ca Ocja, cja guegue-ca bi perdonabi car Abraham ca rá nttzo ca mí tu. ⁷ Nuquigueju, i nesta gui padiju, ¿to cu cjahni cu i ccahti ca Ocja ncjahmu í bajtzi car Abraham? Gue yu cjahni yu xí hñeme car Jesucristo ncja ngu gá hñeme ca Ocja car Abraham. Guejti yu cjahni-yá, xí mperdonabi ca rá nttzo ca i tuju, ncja ngu gá mperdonabi guegue-ca. ⁸ Ya má ndo yabbu, ca Ocja bi mbeni di un cu cjahni cu jin gui judio car salvación, göhtjo cu to di guati jár dyε cár Ttu. Eso, i jux pu jar Escritura nar palabra ná bi man ca Ocja bbu mí nzoh car Abraham: “Nuquigue, xcú hñeme da ncja ca xtú xihqui, eso, xcú töti car nzajqui ca ntjumay. Por guegue ca hnar cjahni ca da hmay digue quer cji, rá ngu cjahni, mingu göhtjo cu jöy hua jar mundo, da döti cár nzajquiju hneje.” ⁹ Gue cu cjahni cu xí hñeme car Jesucristo, macju jin gui judio, xí ttuni mismo car bendición ca bi ttun car Abraham. Ca Ocja jin da dyuhtibi ur huenda digue ca rá nttzo ca i tuju.

10 Nu ca cjahni ca i teniju car ley ca bi man car Moisés, como ga hñinaju, por rá nguehca, drí dötiju car nzajqui ca jin da tjegue, jin da dötiju-ca. Da bbediju, como ndejma jin gui zojtiju göhtjo ca i man car ley. Como i jux pu jar Escritura: “Car cjahni ca jin da zojte göhtjo ca i mam pu jar ley, da bbedi.” **11** Ya xqui fadi, göhtjo ca to i ten car ley, jin gui jöti da zojte göhtjo ca i ma. Eso, bí janti ca Ocja, göhtjo-ca i ndujpite. Guejjo, i mam pu jar Escritura: “Car cjahni ca i tehm*u* ca Ocja da guhtzibi göhtjo ca i tuu, como guehca xí man-ca, guegue xí ndöti car nzajqui ca i ntjumu.” **12** Nu car ley ca bi man car Moisés jin gui xijquiju, bbu gu tehmiju ca Ocja da gazquitjoju ca dí tuju, guegue da ddajquitjoju car nzajqui ca i ntjumu. I xijquiju car ley, bbu gu zojtiju göhtjo ca i ma, nubbu, gu tötiju car nzajqui ca i ntjumu. Cja bbu jin gu zojtiju, nubbu, gu bbediju bbu.

13 Nu car Jesucristo bi tzöhui car castigo ca gua tzögöju. Bbu mí ddöti pu jar ponti, ncjahmu dú mböjmu guegue. Guegue bi ttun car castigo ca i jux pu jar ley da ttun ca cjahni ca i ndo ndujpite. Nu car tiempo bbu mí tjux car ley, mí hnaxi hnar za car cjahni ca xquí ttembi cár castigo pa di bböhti. Ncjapu gá nzah car palabra ca i mam pu jar Escritura: “Car cjahni ca i hnaxi hnar za, ca Ocja da guh pu jabu da bbedi, pa drí guti ca xí dyóte.” Porque bbu mí dú car Jesucristo, guegue-ca bi guti ca rá nttzo ca xtá ötije. Ncjapu gá tjeh cár ttzedi car ley ca mí mandadoguije. **14** Cja nuya, ya xí jogui pa da ttun ca cjahnitjo ca jin gui judio car bendición ca bi ttun car Abraham bbu mí man ca Ocja jin te

mí tu. Yu judio co hnej yu cjahnitjo yu jin gui judio, parejo da ttun car nzajqui ca jin da tjegue, göhtjo yu to da hñeme cár Ttu ca Ocja ncja ngu gá hñeme ca Ocja car Abraham. Cja nuya, göhtjoguigöju como ngu xtá emeju car Jesucristo, parejo xcá ttajquiju car Tzi Espíritu Santo, ncja ngu gá promete ca Ocja di menquigöju-ca.

La ley y la promesa

¹⁵ Nuya, um cjuadaquiju, gu xihquiju hnar ejemplo pa gui ntiendeju, rá nzejti car acuerdo ca bi dyotihui ca Ocja car Abraham. Yu cjahni, bbu ga xoxju hnar acuerdo, i reglaju pa göhtjo da hmepju gá acuerdo, cja diguebbu ya, i firmaju. Nubbu, ya xta ttéme car acuerdo, bbu. Ya jin da jogui da tjuhtzibi pe hnar palabra o da mpöti tema parte.

¹⁶ Ca Ocja bi xih car Abraham hnar promesa, cja rá nzejti car promesa-cá. I jñejmi hnar acuerdo rá nzejtjo. Bi xifi di bendeci car Abraham, yojmi ca hnáa quí mboxibbejo ca drí gatzí di hmay, cja pé bi xifi, por rá ngue ca hnáa, di bendeci göhtjo cu cjahni hua jar jöy. Bbu mí dö nar promesa-nu ca Ocja, jin gá ñq digue göhtjo quí bajtzi car Abraham. Guegue bi maq: “Por rá ngue ca hnaatjo ca da hmay, gu bendeci göhtjo yu cjahni hua jar jöy.” Guegue mí ñq digue car Jesucristo. ¹⁷ Dyøjmaju ca gu xihquiju ya: Bbeto ca Ocja bi un cár promesa car Abraham, bi goh-ca ncja ngu hnar acuerdo, cja bi xifi, ntjumay di cumplí ca xquí maq. Diguebbu ya, bi tjo cuatrociento treinta año, cja nubbu, ca Ocja bi un car ley cu cjahni israelita. Pe jin gá mpun car promesa ca xquí ttun car Abraham. Már nzejti-ca. ¹⁸ Yu to i eme ca Ocja, i tóhmi da ttundi ca rá zö,

porque guehcä xí män ca Ocja. Bbä di nesta cä cjahni cä i emë ca Ocja di dën car ley pa di däh car bendición ca xquí män ca Ocja di un quí familia car Abraham, jin te di muhui car promesa-cä bbä. Nu ca Ocja xquí xih car Abraham di undi car bendición co cár tzi pöjö, di uni guegue-cä cja co quí bajtzi cä di hmøy. Jin te mí nesta di mëh car Abraham pa di däh car bendición.

19 Xi ya bbä, como ya xi mí bbäh car promesa, ¿te rá nguehcä pé bi ttun cä cjahni car ley, bbä? Bi ttuni pa di bädijä, már nttzo ca mí øtija. Güí hñé jitzi car ley. Car Tzi Ta jitzi bi döjti cä dda ángele, cja guegueju pé bi döjti car Moisés pa bi xih cä cjahni israelita. Car ley mí nesta di ttøjte hasta bbä di hñeh car Jesucristo. Nuca, guehcä xquí män ca Ocja di hmøy digue cár cji car Abraham pa di bendeci göhtjo yä cjahni jar jöy. Car ley mí ncja ngü hnar acuerdo ca bi xoxihui ca Ocja cä cjahni israelita. Bbä di dyøjti-cä, ca Ocja di bendeciju bbä. Car Moisés bi hmöh madé ncja hnar nzöya bbä mí tsjox car acuerdo-ca. Guegue bi nzoh cä cjahni israelita, bi xijmä ter beh cä mí män ca Ocja, cja nucä, bi promete di dënijä car ley. **20** Pe bbä to i øti hnar promesa, jin gui nesta car nzöya pa da hmöh madé. Eso, jin tema cjahni gá ngo jár lugar ca Ocja bbä mí tsjih car Abraham car promesa. Guejtjse ca Ocja bi män cár promesa, bi xih car Abraham. Más rá zö car promesa, bbä, ni ndra ngue car ley.

El propósito de la ley

21 ¿Cja dár mängö bbä, i ncontrahui car ley ca bi män car Moisés co car promesa ca bi män ca Ocja? Jin gui ncontrahui-cä. Como car promesa

i ddajquiju car nzajqui ca jin da tjegue, nu car ley jin gui ddajquiju car nzajqui-ca. Bbu di ddajquiju car ley hnar ddadyo hmay pa ya jin gua øtiju ca rá nttzo, nubbu, di jogui gua teniju car ley pa di nuguiju rá zö ca Ocja. 22 Nu ca i sirve car ley, i xijquiju rí ntzöhui gu bbediju, dí göhtjoju, como jí xtá jötiju gua cumpliju ca i ma. Ncjapu gá man car Escritura digue car ley. Eso, jøñu yu cjahni yu xí nguatiju jár dye car Jesucristo da nú car nzajqui ca jin da tjegue, cjaguegue-yu da ttuntjo ncja ngugá promete ca Ocja.

23 Nugöje, dí israelitaje, bbu jí bbe ndí øjme, i nesta gu emebitjoje cár tzi ttiju qui ca Ocja pa da ttajquije car nzajqui ca jin da tjegue, ndí ncjaje ncja nguu preso. Ndí jonije ja gua pønije libre, pa jin gua bbedije, como gue car castigo-cá mí embiguije car ley. 24 Car ley mí ncja nguu hnar möxte ca i ccahtibi quí bajtzi cár patrón, cjagugöje ndí jñejme cu bajtzi. Ncjahmumí jantiguije cjag mí ccaxquije pa jin gua øtije ca rá nttzo. Pe ndejmau ndí øtije-ca. Eso, bbu ndú ødeje digue car Jesucristo, dú cuatije guegue pa di gazquije ca rá nttzo ca ndí tuje. Nubbu, bi jogui pa bi cuajtiguije car Tzi Ta jitzi ncjahmujin te gri tuje. 25 Cjag nuya, como ya xtú emebije cár tzi ttiju qui car Jesucristo, ya jin dí cjajpije ncaso car ley. Ncjahmuya xtú ncjahniye ya. Ya jin dí jonije car möxte pa da jantiguije.

26 Nuquigueju, guí cjahnitoju, göhtjoquigueju como nguu xquí cuatijujá jár dye car Jesucristo pa gui töti quer nzajquiju, ya xcú cjaju í bajtziquiju ca Ocja. 27 Guejtjo, como xcú xixteju, göhtjoquigueju xcú fadiju hnar ddadyo vida ca rí hñeh ca Ocja.

Guí jñejmu ncja hnar cjahni, xí ngahzi qui dajtu rá nttzo cja pé xí jie ddadyo datu, göhtjo limpio. Nuya, göhtjo ir vidaju, gui hñoju car Jesucristo. ²⁸ Bbu xcú hñemebiju cár tzi ttijqui car Jesucristo, jin te i cja bbu gür judio o jin gür judio. Guejto jin te i cja bbu gür muzotjo, guí pejpite, o bbu guí nútsje quer bbefi cja i bbu möxte cu i pejpiqui. Jin te i cja bbu gür hñojø o gür bbejña. Car Tzi Ta jitzi i ccajtiquijü göhtjo parejo. Göhtjo í bajtziquijü, como xcú hñemebiju cár Ttu. ²⁹ Como í cjahniquijü car Jesucristo, ya xqui jantiquijü ca Ocja ncjahmu í bajtziquijü ca ndor Abraham, cja guegue da ddahquijü car bendición rá tzi zö ca bi prometebi car Abraham cja co qui bajtzi cu pé di hmuy.

4

¹ Nuya, gu mbeníjü ja i ncja yü bajtzi hua jar jöy hne ja i ncja yí bajtzi ca Ocja. Bbu di bbuh hnar tzi hñojø, cja di man cár ta, guegue-cä da uni gá herencia göhtjo ca i pehtzi, ndejma jin di uni hasta bbu ya xtrú hñojø. Menta ur bajtzipro cár ttu, jin tema cargo i ja pu jár ngü. I cja jmandado ncja hnar muzo, masque guegue da cjapipr ur mejti göhtjo cu i bbuh pu jár ngü cár ta. ² Guejjo i bbuh car möxte ca i föh car bajtzi cja i nú, hasta bbu xta zoh car pa ca xí man cár ta, bbu ya xtrú te. ³ Nugöje, dí judioje, ndí ncjaje ncja ngü bajtzi, cu cjeya cu xí tjogui, bbu jí bbe ndí padije digue car Jesucristo. Mí tsjijquije te gua øtije, como cja ndí fadije ndí nxöjme ter beh ca rá zö, ter beh ca jin gui tzö. ⁴ Pe bbu mí zoh car tiempo ca xquí mbení car Tzi Ta jitzi, guegue bú pejni cár Ttu hua jar jöy. Hnar bbejña bi un cár nzajqui, cja bi hmuh cár tzi bajtzi,

mí gue car Jesús. Guegue-cá mún judío, bi cumpli göhtjo ca i man car ley ca bi zoguije car Moisés.
5 Eso, bi jogui dú mbödije guegue, göhtjoguigöje yá ndí tenije car ley. Como bbá mí dý car Jesucristo, bi tzöhui car castigo ca di ttajquigöje. Nubbá cja dý hmäpje libre. Nuya, car Tzi Ta jitzi xí cjagui í bajtziguje, í ttäguije o í ttixuguije. Ya jin dí ncaje ncja ngú muzo ya.

6 Nuquiguéjá, como ya xcú cjajá í ttäquijá ca Ocja, guegue-cá xpá mëjnquijs car Espíritu Santo. Guejti-cá mí yojmi car Jesucristo, cár Ttá ca Ocja, cja nuya i bbá mbo ir tzi mayu. Nuya, bbá dí nzojmá ca Ocja, dí xijmá: “um Tzi Taquije,” como gue car Tzi Espíritu Santo ca i ñá. **7** Nuya, ya jin guí muzojá ya, como í ttäquijá o í ttixuquijá ca Ocja. Ca ya xquí cuatijá jár dyé car Jesucristo, guí yojmá guegue ya cá. Nuya, car Tzi Ta jitzi i ccajtiquijá ncja ngú ga ccáhti cár Tzi Ttá, cja da jequijá car herencia ca da un cár Ttá.

Pablo se preocupa por los creyentes en Galacia

8 Mähmeto bbá jí bbe nguí meyajá ca Ocja, nguí ncrajá ncja muzo, cja mí mandadoquijá cù dda cjáa cù jin te i bbá úr nzajqui. **9** Pe nuya, ya xquí meyajá ca Ocja ca ntjumá y i bbay, o mejor, gu majmá, guegue xí nzoh quir tzi mayu. Xi ya ¿dyocá guí ne gui cojmá xatja pa pé gui tenijá cù dda mandamiento cù jin te i ddajquijá nzajqui, cja jin gui föxquijá pa gu ótija ca rá zö? ¿Dyocá pé guí ne gui jñeguijá pa pé da mandadoquijá cù mandamiento-cù? **10** Guí tzujpitjojá cù pá cù i tsjifi rá mädi, cù mbaxcjua gá ddadyo zaná, co cù tiempo rá nttzujpi. Guí ihtzibitjojá ca rá yojto

cjeya bbu jin guí pejpiju nar jöy. ¹¹ Dí ntzøtigö ca guír tendiju cu costumbre-cu, cja dí tzugö, más xí bbeh cam bbefi ca dá xihquiju car evangelio.

¹² Dí öhquiju tzu, um cjuadaquiju, gui jiejmu ya cár ley car Moisés, ncja nguguigö, xtú jegui. Máhmeto ndí tengö caq, pe dú jegui pa gua hmuy ncja nguquigueju, guí cjahnitjoju, jin guí judioju. Jin tema cosa rá nttzo gú dyøjtiguiju bbu ndí bbejcö pu. Ndí bbepju rá zö. ¹³ Guí padiju, bbu ndí tzøti pu jabu guí bbepju car primera vez, ndí jñini, eso jin dá tjojtjo, dú hmajti pu dú xihquiju car evangelio. ¹⁴ Már nttzo car jñini ca ndí tzöbbe, pe nuquigueju, jin gú despreciaguiju por rá nguehcaq. Ndejma gú cuajtiguiju ncjahmu ndúr ángele xtrú mejni ca Ocja pu jitzi. Gú nuguiju rá zö, ncja ngu güi recibiju guejtsje car Jesucristo. ¹⁵ Nguí ndo mpójmu ca dá hmepju tzu. Xi ya ¿dyocaq ya jin dí mpójmu ya? Ciento dí xihquiju, cu pa cu ndí bbepju, bbu di cja manera, güi cuhmi quir döju cja güi ddajquiju, güi dyøtiju ncjapu pa gua ccahtigö rá zö, cja nuqueju, güi ndo mpójmu bbu. ¹⁶ ¿Te xcú caju ya? ¿Cja huá guí uguiju ya porque xtú xihquiju ca ncjuani?

¹⁷ Nu cu dda cjahni cu i nzohquiju, i ndo joniju ja guír ntzixiju, pe jin gui tzö ca i mbeniju. I joni ja drí jueguiju pa ya jin gu joju, cja pa jøña guegue-cá gui tenuju. ¹⁸ Bbu di ntjumay di mahquiju cu cjahni cu i ne gui ntzixiju, nubbu, di mahquiju göhtjo ur tiempo, cja jin gui jøntsje bbu dí pagö pu. Nubbu, drá zö cár mfeniju, bbu. Nugö, dí mahquiju göhtjo mbo um may, masque jin gui tzö gu hmajcö pu. Nu cu to i nzohquiju pa gui ntzixiju-cá, jøntsjetjo porque i huizquigö, guegue-cá, jin te ntjumay ga

mahquiju. ¹⁹ Um tzi bajtziquipu, bbu dí mbenquiju, dí ndo ntzóte. I ddajqui ur dumay ncja ngu hnar bbejña bbu ya xta odi. Jin da jñu um maygö hasta bbu xtá padi, cierto, xcrú hñemebiju cár tzi ttijqui car Jesucristo, jøña-ca. ²⁰ Quiera gra bbejcö pu jabu gár bbepju, pa di jogui gri ñaju tzu, cja pa gua padi ja pé grá nzohquiju pa gui dyødeju. I ndo dyo um maygö, ¿dyoca xí mböh quir mfeniju ya bbu?

El ejemplo de Agar y Sara

²¹ Nuquigueju, yu to i ne da deniju car ley ca bi man car Moisés, ¿cja jí bbe guí ødeju te i ma? Gu xihquiju ya ja i ncja. ²² Porque i mam pu jar Escritura, car Abraham, mí hñi yojo quí ttu. Ca hnaa ya, mûr ttu cár muza, cja ca pé hnaa ya, mûr ttu ca mero ár bbejña car Abraham. Cár bbejña car Abraham mí ju cár tjuju mûr Sara. Nu cár muza mí ju cár tjuju mûr Agar. ²³ Car Abraham bi yojmi cár muza como bi mbeni, guegue-caq di ømbi hnár bajtzi. Cja cierto bi hmah cár ttu cár muza, mûr Ismael. Nu cár ttu ca mero ár bbejña car Abraham, bi hmay pa di zuh ca xquí promete ca Ocja. Guegue mûr Isaac. Bbu mí hmah car bajtzi-caq, ya xquí nchujchu rá zö cár me, cja jí mí ønte göhtjo ár vida. ²⁴⁻²⁵ Nu cu yojo bbejña, car Agar co car Sara, i sirve gá ejemplo. Ca hnaa i jñejmi car ley ca bi tsjh cu cjahni israelita por digue car Moisés. Nu ca pé hnaa ya, i jñejmi car promesa ca bi tsjh car Abraham cja co quí bajtzi cu di hmay. Car ley bi ttun car Moisés bbu mí box pu jar ttøSinaí pu jar jöy Arabia. Cja nu yu pa ya, guehpu jar jñini Jerusalén i ttuji car ley ca bi zoh car Moisés. Cja cu cjahni cu i tendiju car ley, i jñejmu muzo-cu. Pe

göhtjo yu to xí nguati jár dye car Jesucristo, i jñejmu cár bajtzi car Sara, como guejcoju dí emebitjoju cár promesa ca Ocja. ²⁶ Car promesa-ca güí hñeh pu jitzi pu jabu i tsjifi car ddadyo Jerusalén, cja nu pu jitzi, ya jin gui ttøhtibi ncaso car ley ca bi man car Moisés. Eso, i jñejmi ncja hnam meju car ddadyo Jerusalén, como rí hñeh pu car ddadyo nzajqui ca dí pehtziju ya. ²⁷ I bbuh ca hnar palabra ca bi jñux car profeta Isaías, ncjahmu i ña digue car ddadyo Jerusalén, i tjequihui hnar bbejñu. I ina:

Gui mpöj ya, nuquigue, gúr bbejñu, pe jin guí ønte. Nunca xquí odi, pe nuya gui xöjtibi ca Ocja cor pöjö, cja gui ña nzajqui.

Macja xí nzoquiqui quer dame, ndejma da hmuh quir bajtzi rá ngu, como ca Ocja da ddahqui-cu.

Nuque, xquí hñiji más drá ngu ni ndra ngue car bbejñu ca i bbubi cár dame.

²⁸ Nugoju, cjuadu, dí jñejmu car Isaac, ca mûr ttu car Sara. Como xtú emebiju cár promesa ca Ocja ncja ngu gá hñemebi car Abraham, car Tzi Ta jitzi i n^uguiju ncjahmu í bajtziguiju guegue-ca. ²⁹ Cu pa cu mí bbuh car Abraham, jin gá johui cu yojo quí ttu. Ca hnaa ca mûr bajtzi car muza bi uhui car Isaac. Nu ca Ocja jin gá xih car Abraham di cuajti cár muza gá bbejñu. Guejtsjehui yojmi bi mbenihui-ca. Nu car Isaac bi hmuy porque guehcu xquí man ca Ocja. Car Abraham co ni car Sara bi hñemehui car promesa ca xquí tsijmi, cja ca Ocja bi un cár bajtzhui. Guejti yu pa ya, cu cjahni cu i tendiju car ley i uguiju, como jøñu cár promesa ca Ocja dí emebiju. ³⁰ ¿Te i man car Escritura digue

cá yojo bajtzi-cá? I xijquijá ncjahua: “Gui fongui car muza, da bøni, da zix cár ttá. Jin gui ma gui jieh cár ttá car muza da huimbi cár herencia ca mero ir ttá. Gui uni cár ttá ca mero ir bbéjñá.”

³¹ Nugöjá cjuadá, bbá ya xtú emebijá cár ttijqui car Jesucristo, ya jí rí ntzöhui gu emebijá car ley, pa da ddajqui am nzajquijá. Nuya, dí jñejmá cár ttá car Sara. Jí mür muza guegue-ca. Ya xtí pehtzijá car nzajqui ca i ntjumáy pa gu hmepjá libre.

Sigan firmes en la libertad

5

¹ Car Jesucristo bi goji por rá nguejcöjá bbá mí du, eso, dú pønijá libre. Ya jin gui mandadoguijá car ley ca bi man car Moisés. Hnëhquiiguejá, bbá ya xcú cuatijá jár dyé car Jesucristo, nuya jøntsje cár tzi ttijqui gui hñemebijá. Dyo pé gui jñeguijá da hmejpiquijá pa pé gui tenijá car ley.

² Gui hñemejá nu dí xihquijá. Nugö, dûr Pablo, dí nzohquijá. Bbá gui jñeguijá pa da ttøjtiquijá car seña ca i ttøhtibi cù judio, i pøni ncjahmá guehcá guí emejá bbá, pa da núquijá rá zó ca Ocja. Nubbá, jin te ntjumáy ca xquí hñemejá car Jesucristo, bbá. ³ Dí yojpi mbëmbiquijá, cù to da jñegui pa da ttøhtibi car seña-ca jáy cuerpojá, guegue-cá i nesta da zøjte góhtjo ca i man car ley, cja bbá jiná, ca Ocja jin da recibi. ⁴ Nuquiguejá, como ngu gri hñinajá, da núquijá rá zó ca Ocja porque guí tenijá car ley, ya xcú jiejmá car Jesucristo, bbá. Ya jin da salvaquijá co cár tzi ttijqui, como ya xqui hnahnó ca guí emejá ya. ⁵ Nugöje, como ngu xtá cuatije jár dyé car Jesucristo, dí yojme cár Tzi Espíritu Santo,

cja guegue-ca i xijquije, bbu xtá ntjeje car Tzi Ta jitzi cja da jñanquije ur huenda, da xijquije jin te dí tugöje. ⁶ Cu cjahni cu i emebitjo cár ttijqui car Jesucristo, jin gui nesta da ttøhtibi car seña ca i ttøhtibi cu judio. Bbu ya xquí ttøhtibiju car seña-ca, ante que di guatiju car Cristo, jin te i cja. Pe guejto jin te i muhui ca xcá ttøhtibiju-ca. I ne ca Ocja pa gu emeju car Jesucristo cja co cár tzi ttijqui cja gu majteju hneje.

⁷ Bbu ndú pøngö pu jabu guí bbapju, ya xí nguí teniju rá zö nar hñu nu i xijquiju, ca Ocja i ccajtiquiju rá zö por rá ngue cár tzi ttijqui. Xí ya bbu, ¿toca xí jiöhquiju, eso, ya jin guí ne gui teniju bbu? ⁸ Guí hñeh ca Ocja car palabra ca dí xihquiju, cja guegue xí nzojti qui ir tzi mayju pa xquí hñemeju. Nu car palabra ca guí teniju ya, jí xcuí hñeh ca Ocja-ca. ⁹ Ya xcú dyødeju nar jñaq-na: “Hna tzi tujqui cár siento car tsji da ntjantzihui car cuní tujme, cja da ngujqui hasta bbu ya xtrú ixqui göhtjo car cuní.” I ncjapu hneje cu mfeni cu jin gui tzö cu i tsjhquiju. ¹⁰ Nugö ndejma dí tohmi ca Ocja da möxquiju pa gui teniju ca ncjuani cja pa jin gui hñemeju cu mfeni cu jin gui tzö. Bí pah ca Ocja to cu i ne da jiöhquiju, cja guegue da un car castigo ca rí ntzöhui-cu.

¹¹ Gui mbengueju tzu, cjuadq, te tza i øjtigui tujni cu judio. Nugö, bbu gua xij yu cjahni, i nesta da ncuajtibi yí cuerpoju ca hnar seña ca i ncuajtibi cu judio pa di ccuhtzibiju ca rá nttzo ca i tuju, nubbu, jin to di dyøjtigui tujni bbu. Pe nugö dí maq, jøntsjetjo ca gá ndu car Jesucristo pu jar ponti, por rá nguehcu, xí nguzquiju ca Ocja ca ndí tujpiju cja ya xqui núguiju rá zö. Nu cu judio i ndo uju car

palabra-ca. ¹² Nu cu hñøjø cu i ne da wentziquiju jar hñu, dé i εquiju pa da ttøjtiquiju car seña-ca. Dí mangö, xajmaq da jíejquitsje cár ngøju pa da zøjti quí mfeniju cja pa da jiequiju gui teniju jøntsje car Jesucristo.

¹³ Nuquigueju, cjuqda, ca Ocja xí nzohquiiju pa gui hmepju libre, cja pa ya jin da mandadoquiju car ley ca mí man car Moisés. Pe jin gui ttahquiiju ur tsjεjqui gui dyøtiju göhtjo tema cosa ca guí neju por rá nguehcaq ya xquí jiejmu car ley-cá. Mejor gui ntzohmiju ya, ja grí mföhxu cja co ja grí majtsjeju, guí göhtjoju yu xcú hñemeju car Jesucristo. ¹⁴ Bbu ntjumay guí ne gui cumpliju göhtjo ca i man car ley, gui dyødeju nar palabra naq i maq: “Gui ne quer minga-cjahnihui ncja ngu guir netsjegue.” ¹⁵ Pe ndejmaq dí øjcö, i cja juení pu jabu guí bbepju. Bbu jin gui jiejmu ca grí hueniju cja guír ntzaniju, i dyo peligro, ya jin da ttéme car evangelio, cja da bbej yu dda cjahni hneje.

Los deseos humanos y la vida por el Espíritu

¹⁶ Nuquigueju, pa gui hmepju ncja ngu ga ne ca Ocja, gui dyøtiju ca da xihquiiju car Tzi Espíritu Santo. Nubbu, jin da dähquiiju quir mfenitsjeju pa gui dyøtiju ca jin gui tzö. ¹⁷ Nu cm mfenitsjeju cu jin gui tzö, jin gui johui cár Tzi Espíritu ca Ocja. Hnahño dí netsjeju, hnahño i ne car Espíritu Santo, ncjahmu dí ntøxtiju-ca. Eso, jin gui tzö gu øtiju göhtjo ca dí netsjeju, como cár Tzi Espíritu ca Ocja i ccahtzi cm mfenitsjeju cu jin gui tzö, pa jin da daguiju-cu. ¹⁸ Guejto, bbu gui dyøtiju ncja ngu ga xihquiiju car Espíritu Santo, ya jin guí nestaju car ley pa da mandadoquiju hneje.

19 Ya xqui fədi ja ga hməh cə cjahni cə i bbəjtsje
cjə i ətiju göhtjo tema cosa ca i mbentsje mbo í
məyju. Gueguejə i bbəbi bbəjñə o hñøjø cə jin
gui ntjajtihui, i jñegui da dəpi cə nttzomfəni cə i
mbenijə, i bbə í tzöjə. **20** I emejə cə dda cjáa cə
jin gui hñani, i mbruja quí minga-cjahnihui o i əti
tjoni. I uhui quí hñohui, i huənihui cjə i huhtzhui.
I ungui ur cue. I hñexihui. Cada hnaa i joni ja drí
ttihtzibi guegue. I juejqui cə hermano cə xí hñeme
car Jesucristo, cjə i ujti hnahnō mfəni cə jin gui
ncjuani. **21** I mvidiabi quí hñohui, i pöhtite, ttzodyo
cjahni-cə, i ntj, i jaxti ur xuy gá mbaxcjua pə jabə i
ətiju ca jin gui conveni. Cə cjahni-cə i əti nduntji
cosa rá nttzo, ncja ngu yə xtú juxcua. Nugö xtú
xihquijə máhmeto cjə pé dí xihquijə ya, cə cjahni
cə i əti yə cosa-yə, jí í bajtzi ca Ocja, cjə jin da ñati
pə jabə bí bbə guegue-ca.

22 Nu cə cjahni cə i yojmi car tzi Espíritu Santo,
guejtjo i jmeya por rá ngue ca i ətiju. Nucə, i majte,
i mpöjö, i jy í məyju, i pehtzibi ur ttijqui quí hñohui,
i ccahti rá zö quí minga-cjahnihui cjə i jujjqui, i
mən ca ncjuani cjə i cumpli ca i majmə. **23** Jin
gui hñixtsjejə, i penti quí mfənijə, cjə jin gui jñegui
da dəpi quí nttzomfənijə. Cə cjahni cə i bbəy
ncjapə, jin gui nesta car ley pa da mandadobijə.
Guejtjo hneje jin gui bbəh hnar ley ca di ccahtzi
ca i əti-cə. **24** Nu yə cjahni yə xí nguatiju jár dyε
car Jesucristo, ya xqui pehtzijə hnar ddadyo hməy.
Guebbə mí du car Cristo pə jar ponti, ncjahmə bi
du pə hneje ca bbəto um hməyjə ca ndí bbəjcöjə,
göhtjo co cə nttzomfəni cə mí eguijə máhmeto.
25 Car Tzi Espíritu Santo xí ddajquijə car ddadyo

nzajqui ca dí pehtziju ya. Eso, rí ntzöhui gu øtiju ca i xijquiju-ca, gu jñeguiju pa da mandadoguiju. 26 Ya jin to da hñixtsje o da hñexihui cár hñohui pa más da ttijtzibi guegue ni ndra ngue cár hñohui. Gu mpöjmu cja gu joju, pa jin gu tzøhtibiju úr muy cam hñohuiju.

Ayúdense unos a otros

6

1 Nuquigueju, um cjuaqucajuiju, bbu xcú ccuah*tiju* hnar cjuadua, xí jiöti ca Jin Gui Jo, ndejmu xcá dyøti hnar cosa rá nttzo, yu pé ddaa yu i dyojuu rá zö jár hñu ca Ocja, da nzojmu cor ttijqui ca hnaa ca xí ndögui, cja pé da möxjuu pa da den car hñu. Nuquigueju, yu pé ddaa, gui mföjtsjeju hneje, pa jin da dahquiju ca Jin Gui Jo. 2 Gui föxjuu quir hñohuiju cu i tzö rá ntji pa drí den car Jesucristo. Gui madiju-cu. Gue nar ley nu xí nzoguiju cam Tzi Jmujuu Cristo pa gu teniju.

3 Bbu to i mbeni mbo úr tzi muy, guegue i ndo sirve, i hñixtsje car cjahni-cau. Nxøgue ur ntjötitjo ca i mbeni, como jin gui muhui más ni ndra ngue cu pé ddaa. 4 Dyo guí tzohmi quir hñohuiju pa gui mantsjeju, más rá ndo zö guir hmejqueju ni ndra nguehcu. Bbu guí jequitjohui quer vida cár vida quer hñohui, jí rí ntzöhui gui hñixtsje, masque guí ina guí tapi-cau. Cada hnaaguigueju gui ccahtitsje quer vida. Cja bbu guí bbuy ncja ngu ga ne ca Ocjau, nubbu, rí ntzöhui gui mpöh bbu. 5 Cada hnaaguigöjuu gu döjtiju ur huenda ca Ocja digue ca dí øtiju. Eso, cada hnaaguigöjuu gu nútseju yum vidaju.

6 Car cjuadá ca i ujtiquijá cár palabra ca Ocja, i nesta gui jejquibijá hna parte göhtjo ca guí pehtzijá.

7 Dyo guí nquivocajá. Gui mbénijá, ca Ocja bí padi göhtjo ca dí otijá, cja da cozquijá según ca xcrú øtigöjá. Jin to da jiötì pa jin da badi ja i ncja cu xí dyøti guegue. **8** Car cjahni ca i mandadotsje cja i öti cu ntzomfeni cu i mbén i mbo úr méy, da bbedi. Nu car cjahni ca i yojmi car Tzi Espíritu Santo cja i öti ca i ne-caq, da mehtzi car nzajqui ca jin da tjegue, gue car nzajqui ca i ddajquijá cár tzi Espíritu ca Ocja. **9** Jin da mfadaguijá gár otijá ca rá zö. Gu segue gu øhtibijá cár voluntad ca Ocja. Cja bbu jin gu cojmá madé úr hñu, bbu xta zóh car tiempo, guegue da ddajquijá hnar tjaja rá tzi zö. **10** Cada bbu ga jogui, gu øhtibijá ca rá zö cm hñohuijá cu xí hñeme car Jesucristo. Guejti cu pé dda cjahni cu jin gui emé, rí ntzöhui gu föxju-cu hnejeé.

Advertencias y saludos finales

11 Ccahtijmagué ya letra rá ndo nojo ya xtú juxcua. Guejquitsjegö, dûr Pablo, xtú øtigö-ya.

12 Dyøjmajá nár palabra nádí xihquijá ya, cu dda fejti hermano cu i equijá pa da ttøjtiquijá car seña ca i ttøhtibi cu judio, i jonijá ja drí jodihui cu judio. Bbu di xihquijá cu cjahni-cá, gui hñemebitjojá cár tzi ttijqui car Jesucristo pa gui tötiá car salvación, nubbu, di ttøhtibi tujni-cá. Eso, jin gui xihquijá ncjapá. **13** Ni digue cu cjahni-cá, jin gui otijá göhtjo ca i man car ley, masque xí ncuatjibi jáy cuerpoá ca hnar seña. Nucu, i equijá pa guejtiá quejijá, da ncuatjiquijá car seña-caq, como i ne da xih cu pé dda cjahni, nuquejá, guí tenijá-cu, cja xcú dyøti

ca xí xihquij. Ncjapu, ga jion ca cjahni-cá ja drí ttijtzibi. ¹⁴ Nugö, dí padi, jin te dí mubbe, cja jin dí jongö ja drí ttizquigö. Nugö, dí ne pa da ttemebi cja da ttijtzibi cam Tzi Jmuj Jesús, como guegue bi dup jar ponti. Bbu mí du-ca, ncjahmu dú tugö hneje. Eso, ya jin dí jongö ca i ñati nar mundo, como ya jin gui importagui. Guejti yu cjahni yu rí en nar mundo i ccajtigui, ya jin te dí importagö hneje. ¹⁵ Nugöju yu xtú emebiju cár tzi ttijqui car Jesucristo, dí padij jin te i muhui ca hnar seña ca i ttøhtibi ca judio. Jin te i importa cja xtrú ncuajtigui-ca o jinaq. Nu ca i muhui, gue ca xcá ddajquij ca Ocja hnar ddadyo hmuy. ¹⁶ Göhtjo cu to i ten nar palabra-naq, ca Ocja da nú göhtjo8co ni cár tzi ttijqui, cja da mötzi pa da hmapj rá zö. Cu to i emeju ncjapu, ntjumuy israelita-cu, mero í cjahni ca Ocja.

¹⁷ Desde rá pa ya, jin to te da jiøxquigö. Jin da xijqui jí úr mejtigui ca Ocja, o jí rí hñeh ca Ocja car palabra ca dí mangö. Por rá ngue ya seña ya i cuati num cuerpo, i fadi to cam Jmucja co to úr muzogui. Gue ya seña-yá mí ncuajtigui bbu nguá ttangui por rá ngue car Jesucristo.

¹⁸ Nuquigueju, cjuqda, da möxquij cam Tzi Jmuj Jesús, cja gui cojmu cár tzi ttijqui-ca. Amén.

I ttzedi hua nar carta-naq.

**El Nuevo Testamento en otomí de San Felipe
Santiago, Edo. de México
New Testament in Otomi, Estado de México
(MX:ots:Otomí, Estado de México)**

copyright © 1975 Wycliffe Bible Translators, Inc.

Language: Otomí, Estado de México

Translation by: Wycliffe Bible Translators, Inc.

Otomí, Estado de México [ots], Mexico

Copyright Information

© 1975, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Otomí, Estado de México

© 1975, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
6040233a-58b9-569e-8ff0-572968a2ee94